

08. oktober 2015

UKA 2015/160

**Siunnersuut uunga: Utoqqalinersiaqarneq pillugu Inatsisartut inatsisaat nr. xx, xx.xx-meersoq.**

(Ilaqutariinnermut, Naligiissitaanermut Isumaginninnermullu Naalakkersuisoq)

Utoqqalinersiaqarneq pillugu Inatsisartut Inatsisissaattut siunnersuut SIUMUT-miit siullermeerininnermut imatut oqaaseqarfigissuarput.

Oqaatigeqqaarusupparput utoqqaat namminiussuseqarnerullutik inuuneqarnissaannik ukiorpassuarni oqallisaaajuarsimasup piviusunngortikkiartuaarnissaa kiisami piviusunngoriartuaartussanngormat assorujussuaq Siumumiit nuannaarutigigatsigu.

Maani inimi issiasugut tamatta inuuniarnikkut atukkat pitsaanerulernissaat qulakkeerusukkipput qularinngilara. Siumumiillu qularutiginnilarput utoqqalinersiaqarnerup aaqqissuuteqqinneqarneratigut utoqqartatta naapertuilluarnerusumik atugaqalernissaat anguneqassasoq.

Utoqqalinersiaqarnerup aaqqissuuteqqinneqarneratigut Siumumiit qularutiginnilarput utoqqartatta inuiaqatigiinni kivitseqataasutut misigisimallutik inooqataaqqilernissaannut manna aaqqissussineq aqutissieqataajumaartoq. Minnerunngittumillu inatsisip utoqqalinersiaqartitsineri inatsisit allannortinneratigut utoqqaat naligiinnerusumik pineqalernissaat qulakkeerneqassammat.

Angerlarsimaffimmi ikiorteqartitsisarneq nunatsinni assigiinngittumik atortinneqartoq ilisimavarput. Ilaatigut Kommuunit aningaasatigut qanoq inissisimanerat apeqqutaalluni ikiorteqartitsinerit ingerlanneqarlutik. Siunnersuummi pisariaqartitsisut akeqanngittumik ikiorteqartinneqartalernissaasa qulakkeerusunneqarnerat Siumumiit nuannaarutigigatsigu oqaatigissuarput. Ikiorteqartariaqarnermik pisariaqartitsineri Siumumiik kaammattuutigissuarput ilaquuttat qanimut suleqatigalugit aaqqissuussinerup ingerlaasissaanik pilersaarusiortoqartarnissaa. Soorlumi tusarniaassutip akissutaasa ilaanni tamanna kissaatigineqarsimasoq.

Aaqqissuusseqqinnissami maluginiakkatta ilagaat utoqqalinissamut nammineerluni katersaqarsinnaanerup kajungernerulernissaa, ilaatigullu utoqalinersiallit pisinnaasut piumasullu sivisunerusumik sulisoqarnermiiginnarsinnaanerannik pilerinarnerulersitsissalluni. Taamatut oqareerluta Naalakkersuisumut kaammattuutigerusupparput aalisartut piniartut nunalerisullu utoqqalinissamut katersaqarsinnaanerannik periarfissat misissoqqullugit.

Utoqqalinersiuteqarneq pillugu ukiorpassuarni oqaaserpassuit atorlugit oqallisigineqartuortoq kiisami Siumumiit isumarput naapertorlugu ilorraata tungaanut iliuuseqarfigineqartussanngorpoq.

Siunnersuummi immikkoortut pingaernerit isumaqatigaavut makku:

- Utoqqalinersiaqalernissamut ukiorititat qaffakkiartuaartinnissaat
- Angerlarsimaffimmi ikiorteqarneq akeqanngitsaq
- Suliffeqarikkut akuuginnarnissamut kajumilersitsiniaaneq
- Toqqammaviusumik utoqqalinersiaq tamanut atuuttoq
- Utoqqalinersianut tapeq
- Meeqanut tapit
- Innarluuteqarnermut aamma peqqiilliuteqarnermut tapit

- Aningaasaqarnermut tapit
- Siunnersuutikkut utoqqalinersiallit Kalaallit Nunaanni ilisisoqartillugu peqataanissamut ukiumut ataasiarlutik angalanissamut akiliunneqarsinnaalissapput.

Siunnersuummi immikkoortuni pineqartut isumaqatigigatsigit annertunerusumik oqaaseqarfiginagit akuersaarpavut, siunnersuutilli peqqissaartumik suliarineqarnissaa pingaartillugu Ilaqutarinnermut peqqissutsimullu ataatsimiititaliami suliarineqarnissaa innersuusutigaaqput.

Jess Svane, Siumut